



Vol. 60 No.02

August, 2021

HINNA THAH



KUMPUNAN

“LALPA DIINGA PHATUAMNGAI”

Tita 2:14

HINNA THAH

Vol. 60 No. 02 | August, 2021 |

Editorial Board

Editor

Rev. Thangkhanlal Hangluah
(7005433057)

Joint Editors:

1. S. Pauchinlian
(9597515230)

2. Hh. Khaizathang
(7005689071)

Subscription Manager

L. Ginsuanmung

Contribution Editors:

Rev. B. Nengzachin

Rev. T. Chinkhangen

Rev. H. Kamkhanlal

Rev. T. Danial

Rev. P. Khamthianmang

Rev. Paukhochinjam Thangsing

NTBCA Office contact no.
7630096496

contents

- Editorial..... 01
- Khrist tanchinpha veinatna 02
- Lungsiat na chu galvan hoih pen ahi 09
- Hagau khawldamna na nei tai? 12
- Ngaihdam a umte kamsuah ah Khrist lianpen 15
- Thunatongte ki etthahna diing 16
- Gah tampi suang 20
- Tanchinpha vaanga kigawm sanggam laizom dougaal meelma bang suah ... 23
- Kingaingiam chapou..... 26
- Missionary tanchin 28
- Sadhu Sundar Singh tanchin 29
- I hinkhua a sil tungte 33

Hinna Thah laah man kum khatin

By Hand = Rs. 150

By Post = Rs. 200

Email Id: ntbca@yahoo.com

Thusuah photmah Editor ngaihdaan
ahi veh sih, a suahtute'n moh
akipuaah diing uhi.

PATHIAN KHOIA UM A HIAI?

S. Pauchinlian

“Lau sih un; ajiahchu Ka hung umpih hi: mangbang sih un; ajiahchu na Pathian uh Ka hi; Ka hung suhaat diing a, ahi Ka hung panpih diing; ahi, Ka dihtatna khut jiatlam in ka hung tu jingjing diing hi,” Isaiah 41:10.

Mangbatna, hahsatna, beidongna leh lungkhamna tuamtuamte in a hung tuam kiim veel chiang in, Pathian khoia um ahiai? ahihloulleh Pathian in ka hahsatna, gentheihna hung theihphaah pihlou a diai? Pathian, taihsan a um ka hiai? chiin i lungtang ah dotna i suangtuah zel hi. Hitobang lungtang a suangtuahna hung neisah chu Pathian hihna i theihte jiah ahi. Bangchiin Pathian i thei viai? Pathian chu mangbatni a panpihtu nai gige Pathian ahi (Ps. 46:1), Khotuahna a dim Pathian, lungsiatna a dim Pathian ahi a, huleh “Ama’n a hung ngaihsah zing jiahin, na lungkhamna zousiah uh a tungah nga un”, (1 Peter 5:7) chih Pathian thu apat i mu hi. Hi Bible changte leh Pathian hoihnate i theihziah un, hun hahsa i tuaah chiang in, Pathian khoia um ahiai? chiin i lungtang ah i suangtuah khazel mah uh ahizaw hi.

I changtel ah, Pathian in bangchiin a gen ei? “Lau sih un; ajiahchu Ka hung umpih hi: mangbang sih un; ajiahchu na Pathian uh Ka hi; Ka hung suhaat diing a, ahi Ka hung panpih diing; ahi, Ka dihtatna khut jiatlam in ka hung tu jingjing diing hi,” achi hi. Hoihtah a ngaihtuah detdet in simlechin, bangchituh a hamuan huai ahiai? Bangchituh a kipaahhuai ahiai? Pathian in i mangbat hun leh chihmoh hun, hun hahsa i tuaahchiang in zong, nopsahna hun ahzong, a hung umpih zingzing ahi. Tu in na mangbat hun in Pathian khoia um ahiai? Lalpa’n ka haamteina hung ngaihkhiat sahlou a de aw? Hitobang hahsatna leh lungkhamnate katuah na chikha meithehi hi. Ahihloulleh Pathian umlou a de aw? Chi in bang na ngaihtuah meithehi hi. Himahleh unau, Pathian in a hung umpih zing ahi chih thei in (Mat.28: 20). Huleh Amah theihloulh leh phallouh in i tungah bangma a tung sih hi (Job 1). Pathian

thu in hichiin a chi hi, “Kawlgit nih paisa khat in akijuaah veu hilou maw? Ahihvaingin a lahva khatmah zong na Pa uh phalna louin ake sih diing hi. Hizongleh na lutung va samjangte nasan sim veh ahi,” Mathai 10:29-30. I Bible chang simna apat in Pathian phalna louin i tung ah bangma tunglou ahi chih a Chiang hi. Hujiahin, hun hahsa ah, Pathian in hung taisan, hung ngaihsah sih chia lungneu leh kingaise meilou diing in ka hung ngeen hi. Husang mah in, Lalpa na deihlam bang ahiai hunghil in, chiin kingaingiam tah in haamtei zawlei, Lalpa'n i hahsatnate a hung theisiam sah diing a, huchiin thuahsiamna zong a hung pe diing hi. Lalpa Pathian na kawmah a umzing hi.

KHRIST TANCHINPHA VEINATNA

~ Rev. H. Kamkhanlal, Pastor NTBC V.Munhoih

Text: Romte 1:14-17, “Grikte leh Grik hiloute kawmah bat ka nei hi, mipil leh mipilloute kawmah zong. Huchiin nanguh Rom khua a umte kawmah zong tanchinpha soi diingin ka kithalawp zing hi. Bangjiahin ahiai i chih leh Khrist tanchinpha chu ka zumpih sih hi, ajiahchu agingta photmah diingin hichu hutdamna diinga Pathian silbawltheihna ahi: Judate diingin ahi masa a, huleh Grikte diingin zong ahi. Ajiahchu hikhu ah Pathian dihtatna chu ginna apat ginna ah suhlatin a umta hi;

“Midihtat chu ginna in a hing diing,” chih gelh bangin.”

THUMAPUI

Coronavirus Pandemic 2021 hii leeng in mihingte ahung delh pha mahmah mai a, doctorte, nursete, policete, pastorte, missionarite, politiciante leh michin teng khentuam neilouin ahung jeelsuah a, sihna ah ahung puijut jungjung hi. Hibang hun hahsatah ituaah laiin, 1987 kum a Rev. Douzapau in KCA bialsung a veh laia a la phuah “Vo gospel kholjin hoi langa

che diing nahim? Nangma ngaiya dangchah sang tampi a umtai... Na thilbol thei lhatdamna ngah jinga...Mol le lhang sang jongleh cheding ka hi, Pakai thupeh juilou thei ka hipoi; A ngailutna ei sol ka chamlou vin, Pakai natoh ka kin ahi ” kichi khuh ka lungsim ah tanchinpha nnatohna awlmohna diah hung pia in ka thei hi. Sildang teng sangmahin tanchinpha natohna veina leh puaahgih thupipeen a ineih diing uh ahi. Hujiahin gingtute jousiah in pan ilaah thah kiitna ahung hih kineem pum in *Khrist tanchinpha veinatna* chih thupi a nei in ikikumkhawm diing uhi.

TANCHINPHA MOHPOTU CHU GINGTUTE IHI

Malaia tanchinpha jatute in tuhun in eiuh khangah ahung tutta va, anachiah masa te'n ahung nutsiatteh uh chu ikawmvah kolsahin aumta hi. Kolsah a umta chu midangte hilhsawn diinga mohpotu ihi uhi. Paul thuteng jat 'ka' (English haam in "*I am*") kichi chu tanchinpha phuangjaahna diinga aloutheiloua aveinat leh akeemtu ahih asulang hi. A hinna a aveinat kuangdoh jiang muhtheih a um chu

"bat ka nei," "ka kithalop," "ka jumpih sih," chiin amang hi. Paul in tanchinpha aveinatna akawm a kolsah ahih dan leh mohpotu ahihna chi thum a anasoite i ensuh diing hi.

Khatna ah, Jentelte jiahin Paul in "bat ka nei hi" (v.14) chih akihe a, "*bawllouh theihlouh ka tunga kinga ahih jiahin; ahi tanchinpha soi sih leng ka tung gih diing ahi*" (1 Kor.9:16) achi hi. Bawllouh theihlouh itung va kinga ahijiah chu Khrist i Lalpa uh ahung hundamtu in "*silsiam chinteng kawmah tanchinpha soi un*" (Mk.16:15) chiin thu ahung pia hi. Gingtu chinteng in Lalpa thupiaah imang veh diing uh ahi. Nichin in Grikte leh Grikloute, mipil leh mipilloute kawmah aloutheilou tanchinpha jaahsah bat in anei hi. Grikte mipil a kisehte chu tawndan nei, lehkha simthei a gelhtheite ahiva, huleh Grik loute chu mipillou a kisehte tawndan mumal neilou, lehkha simtheilou leh gelhtheihloute ahi mai uhi. Grikte haam bang chu a pathiante uh haam achitop uha; Grikte philosophy himhim jong a pathiante uh nuai geiha hi in akikoih top jel uhi. Mihingte chu nam tuamtuam ihiva, haam

ikineih chiatva, agamkaih in ikikhenva, tawndan leh chiindan chiitchiat juite ihiva, heetna leh siamna jila a kikhente ihih baanvah, meel leh puam a jong kituambawlte ihi uhi. Himahleh tanchinpha in chu gamgi aneisah a, mihingte jong khentuam umlou in ahuaamveh hi. Leiba sum ibat ipiaah bangin khristian chinin tanchinpha leiba gingloute kawmah soi diing aloutheilou leiba ipiaah uh angai hi.

Nihna ah, Paul in “Rom khua a umte kawmah tanchinpha soi diingin ka kithalawp zing hi ” (v.15) achi kiit hi. Amah mimaltaha aloutheilou tanchinpha soi diing ahih dan akitheih baanah kithalawpna in ahinkhua adim hi. Jesu sihna khuh “kros thu chu mangthaite diingin ngolhuai ahi a ” (1 Kor.1:18a) kichi chu gingloute diingin lungluut huailou leh ngolhuai bangmah ahi. Himahleh “eiuh hutdama umte diingin chu Pathian silbawltheihna ahi” (v.18b) jel hi. Ama’n hutdamna Pathian silbawltheihna atan chu Rome khopi a soikaal ngaahlah in akithalawp hi. Huleh tanchinpha kolsaha aum hi thu kipaahhuai jasad diinga mohpotu ahihna

ah jong akithalawp boh hi. Mi’n ngainuam in ngainuam lou jongleh, lawhna diing umlou in manna diing chauh hitajongleh, nualna leh sihna diing mun juan ahih jing laiin jong kithalawptah in soikaal angaahlah hi. Unaupa Zahlira 1936 -2001 laphuah ah, “*kei ka chiah jel diing ka puaahgih toh. Hung kiheetmoh bawl siing, ka Lal Jesu, meelma dougaal lian zongleh. Gospel lungsiatna in kalsuan jel diing. Ka Lal deihhuai min hoih chu gum in, Taai siing e khovel ma ah*” achi hi. Pathian thu a hutdamna dihtah mu leh mulou jong kikhethei deuh mah ahi.

Tuni’n Covid - 19 jiaha neeh leh taahdi buai, sum kilohnadi umlou, damtheihna lah hoihlou deuhdeuh, kingaisia lah pung hulhul, nupakaal lah sesuaah jungjung, drugs addiction kibehlap tou, gutate laangse mahmah, giitlouhna leh sualna chinchai um nonlou, gang groups 24 saanga tamzawta, Pathian thu kimaimohta hi. Khristiante hitobanghun lahah tanchinpha soi ikithalawp theihlauh naahlai uh leh bangchih chian kithalawp na diing dang aum diai? Sih hamuanna nei nailou ikiimiveel ah nichin in mi si

jungjung a hutdamna thu soi kithalawp huai hilou maw? ka chi a chiin ka ngaihtuah hi.

Thumna ah, Paul in “tanchinpha chu ka jumpih sih hi” (v.16) achi jom peh hi. Hichu tanchinpha bat anei in, asoi kaal kithalawp pa’n hutdamna thuchah soi diing jumna’n aneilou ahi. Tanchinpha tahtah louin chu hagau leh tahsa a damna hung pejoulou diing ahi. Unaupa Khaizakap laphuaah ah hichiin agial hi, “Tanchinpha deihhuai chiah jel inla, gam mial danga saltaangte pui di’n...Aw damna damna Gospel leengveel inla, kawl kiimveel dongin valeeng inla; Gentheite nuamna, vaahvaite diin inn nuam, na paah gimtuui namchin damna diin.” Tanchinpha soi chu kijumpih huai isah ni atam mah, himahleh jumpih theih diing gual hilou ahih dan chu Setan ta leh soal suaah a koltaangte’n hagau damna tangthei ahijiah un ahi. Achaang ah a jumpih ihihlam bang kihelou anakihitheih ahi. *“Koulawi giap soi gual hisih ve oh”*, chia kiawngsuut hiau maite ihi. Hubaan ah, Bible jilkhalou, kouhtuam a panna nei jong hising kichih eelaal mai. Hichu Lalpa Jesu tanchin

soi ngamloua nual, ataaisia leh ajumpih chih diing mah hilou? Gingtute Pathian thu chu ahun hun bangah tatsatlouh a isoi jel diing uh ahi. Na kijumpih laisiah chu tanchinpha na jumpih jiah ahi. Tanchinpha na jumpih laisiah chu Jesu Khrist na jumpih ahi chih kiheet in. Eilawi chu jumna diing tata a jummo, jumlou keei in Pathian thu jumpih louh diing hun ah ajum a jumsete kihijeel hi. Jesu’n *“keimah leh ka thute jumpih chu mihing Tapa’n a loupina toh, a Pa loupina toh, angel siangthoute loupina-a ahung chiangan amah chu ajumpih diing hi”* (Mk.8:38; Lk. 9:26) chiin ahung na hilh hi. Paul in ginna a atapa Timothy kawma asoi bangin gingtute kawmah jong hichiin asoi hi, *“Thutah thu dihtaha khenin, jumna diing neilou natongtu banga, Pathian ngaiha hoiha kimusah diingin kingaihtuah in”* (2 Tim.2:15) chiin.

TANCHINPHA PATHIAN SILBAWLTHEIHNA AHI

Tanchinpha silbawltheihna chu Pathian in gingtute kawma angansiah ahidhan Paul hinkhua tungtawn in aheth theih hi. Paul in pianthahna dihtah atang masa a (Rom.1:5), tanchinpha

Pathian piaah Khrist suaah hihna tang sehtuama akouh mah ahi (Rom.1:1). Pathian thu thehdalhna ah Rom a gingtute jong kouhna tang ahi uhi. Gingtute ibawnva kouh ihihna uh isepsuah louh leh Pathian silbawltheihna himahleh bangchiin hutdamna silbawltheihna atun thei diai? Hi thuteng “*silbawltheihna*” kichi Grik haam a *dunamis* kichi chu ahoih lam leh ahoihlou lam silbawltheihna in akimang hi. Tanchinpha kisoina ah chu, “*khenkhat kawmah sihna gimnam ... khenkhat kawmah hinna gimnam ka hi uhi*” (2 Kor. 2:16) chiin. Hutdamna nei kichi chu khristian minpua, baptisma tang, Lalpa nitaah ann ne, biaahinn kai jing, sillatte pia, mimal kithunun joute chihna ahi diah sih hi. Himahleh Lalpa Jesu chu Lal leh Hundampa diinga gingtate ahi jaw uhi (v.16). Huchu “*koipouh Tapa gingtain kumtuang hinna aneita...*” (Jn. 3:16, 36) chih ahita hi. Pathian amah silbawltheihna aneih chauh in a Tapa gingtate kawmah hagau hutdamna silbawltheihna atun hi. Huloujong Pathian silbawltheihna chu “*Pathian dihtatna chu ginna apat ginna*

ah suhlatin aumta hi” (v.17) achi kiit nalai hi. Ginna tungtawna dihtatna chu Pathian dihtatna i ginna jaalva itan uh ahi (Rom.3:21,22). Huleh tanchinpha tungtawnin huh dihtatna dihtah Pathian in asulangta chih Paul in asoina ah “*Khrist a ginna tungtawna hung kuan, ginna jaala Pathian apat hung kuan dihtatna chu neia Amah a muha ka um theihna diingin*” (Phil.3:9) achi hi.

Tulai Covid -19 vaccination ahung kibawl leh gingtute hi'n gingloute hitaleh apheengpi in i pumbuai gawp abang hi. Gamsunga thuleengleh kana jaakhkaah leh poi kasah mahmah ngaihdan umte tamlou taahlang ka uut hi. Hute chu: 1) *Setan number 666 toh meehmat in khenkhat kikaap lou top um hi.* 2) *Numeite nauneihna lam sukha ahi.* 3) *Pasalte chii suhtawp na diing ahi.* 4) *Damdawi kikaap teng kumkhat sung a siveh diing* 5) *Khovel mihing tamseengin population suhkiam na diing ahi.* 6) *A kikaap photmah Zombiete bang suaah diing mihing sa ne diing.* 7) *DNA genetic lamtoh kisai suse dimdem diing chi uhi.* Hii leenhun a thuleenglehte'n

Pathian thu akhuupkhe jou phial abang hi. Bangteng hileh biaahinn kikhaah, sunday school building covid care centre suahta, damlou veh kihuphulh tuah, innveh diing jong kilau tuah, mipi kipunkhawm phallouh, sakhovai silte khawlsah ahita hi. Ahihleh buaina, sihna leh thujuau aleengleh nakaal ah eiuh gingtute'n tanchinpha Pathian silbawltheihna suangin kijumpih nonlou in Pathian thutah soina hun lemtaang in imang jaw diing uhi.

TANCHINPHA THEHDALH DIINGIN MUN TEEL IN

Paul in tanchinpha thehdalh a aum na diingin “*Rom*” (v.15) khua mah anateel hi. Rom khua tanchin tamlou soini. “*Rom chu nikhat a bawl ahi sih*” akichi hi. Paul in Rom mite chu mipilloute achi hi. Alehlah ah Rom mite akipatna uh chu Greece apat hi in akikoih va, huleh Dionysius Halicarnassus in Italymite leh Roman mite chu Grik haachte hi in anaso hi. Roman hiphotmah chu Grik mite haam leh atawndan uh jilsah veh in aum uhi. Giitlouhna jousiah umna munpi khat ahi. Mediteranean

suaclam gamkaiha peemlutte'n chu Latin haam saangmah in Grik haam amang jaw uhi. Himun a gingtute chu sumkawlvei mite, sum leh paai a lei leh juahte ahih baanvah, suaachte ahitaangpi uhi. Kouhtuam mite jong Judate saangin Jentelte tamjaw uhi. Emperor Claudius thusuah in Roman Juda mite'n sinagog ah meeting neilou diinga athupiah amang louh jiahun Rom apat in AD 41-54 lahveel in anadelhdoh uhi. Gingtute'n suhdudahna athuaahna mun uh ahijiahin alungsim uh jong akiheng lehleh thei nalai uhi. Gampumpi munpita Rom chu numei-pasal kaal a thaangatna nasatahin aluahdim leh pusa biaahna, sumtawng ichih dan deuh bang, singbul suangbul bia, hagaute bia, dawite hagai biaahna leh kumpipate lim biaahna in munchin aluahdim hi.

Paul in Rom a gingtute chu tamveipi veh anatum mahleh bangchi jawngjawng ahakhat a daal ahithu asoi hi (Rom.1:13). Kouhtuam aveh uut jiah chu “*Hagau silpiaah bangaha ka hung piaah theihna diingin*” (v.11) chih ahesah hi. Hagau silpiaah

achih in Pathian thuginte a kithuhilhna asoina ahitaangpi hi. Tanchinpha thehdalh jel na diingin gingtute khat leh khat ikisuhhaat seem uh ngai ahi. Paul in Jerusalem a Pathian natohna aneih nung Jerusalem kouhtuam in Antioch khua ah *church organize* bawl atup phet un Barnaba in Paul vahawldoh in anihun organize abawlta uhi. Huleh “*Antioch khua ah nungjuuute chu khristian chia kouh ahi masapeen uhi*” (Sil.11:25,26). Hagau Siangthou in Paul leh Barnaba missionary diingin Antioch kouhtuam apat akhenkhiaahsah hi. Paul missionary khualzin athumveina azohnung in Rom khopi ah Kaisar ma a ding din aliveina’n ajin hi. Roman suangkulh ataan masatna ah vehtu jaleentahin anei a, huleh thuhilhna leh thusoitheihna aneiboh hi (Sil.28:30-31). Huhun in Philippite, Ephesite, Kolosite leh Philemon lehkhathotte agelh hi. Hunung kum nga joh suangkulh ataan nihveina ah 2 Timothy lehkhathot agelh kiit hi. Huh suangkulh sungah tanchinpha jahin “*khainiang buhsah*” (2 Tim.1:16) in aum a “*sil gilou bawltu / tualthattu banga*”


(2 Tim.2:9) ngaih in aum hi. Roman thuneitute’n athahpah uh jong akigingta a “*kei chu dawn sillat banga sunbuaah ka hita a, ka chiahdohna hun anaita hi*” (2 Tim.4:6) chiin. Paul sihdan heetchiang hisihmahleh Tradition in tanchinpha aginna jaalin ngawngtan in martar ah si ana hi. Historiante’n atuatdan un apostolte beikuan in million kimkhat khristian anaumta achi uhi. Hulouin Roman Emperor Constantine the Great (306-337) in Romante vaihawmna gamsung ah khristian sahkhua apipeen in anabawl hi. Apostol Paul martar sisan a ana leijoh ahita daih hi. Tunin’ kei leh nanging gospel thehdalhna diingin khoilaitah mun i teel viai? Paul in anuampeen mun saingin tanchinpha natoh na diingin mun hahsapeen alu aphuumna diing in ateelta hi. Unaute, i pulpitte uh kikhaah mahleh khoitah na pulpit diingin na kisiam ei? Sih huamin na ginna chu tukip in. Na mun diing kiteel in!

THUKHUMSITNA

Tanchinpha keemtute ihihna ah bawllouh theihlough Pathian leh mihingte kawmah

ileiba ibatuh ahi gingtute aw. Misualte'n hutdamna atanna diinga Pathian silbawltheihna chu khoitah mun teelbiih in nanei diai? Nang na panna mun na he chian maw? Tutahin mite'n nang ahung poimoh peenpeen na hi. Pathian in ahung koih na mun ah kipan

in. Pastor Rick Warren in hichiin asoi hi, "*Khristian chinteng chu pastor ahisih a, himahleh khristian chinteng chu thunatongtu ahi*" chiin. Hih article hung simsahtute tengteng kawmah kipaahthu ka soi baanah Lalpa'n hung vaangpiaah chiatta hen.



LUNGSIAT NA CHU GALVAN HOIH PEN AHI

~ Genson Tungnung, Missionary

Thumapui: Amasa in simtute tengteng i Lalpa Jesu Khrist minin iitna chibai ka hung buuh hi. Tunin noute toh i khristian hinkhua vah bangchiin gaalzou hinkhua i nei thei diviai chih kikum khom lei ut huai ka sa hi.

I Bible i et chiangin ei gingtuten muh theihte leh muh theih louhte apan dou diing meelma inei uhi. (Ephesite 6:12). Hijongleh Jesu'n gaal dou diingdan ahung zilsah hi. Na meelmate uh lungsiat unla, hamsia hung lohte vangpiaah unla, ahung mudahte diingin silhoih bawl sah un. Huleh a hung bawlsete leh a hung suduhdahte diingin hamteisah un achi hi. (Mathai 5:44). Hi Bible changte hi I nichin hinkhua a diinga poimoh mahmah i byheart ngeingei diing un ahoih hi.

Jesu mahmah khovel ah aleen sungin eite ettawn theih diingin lungsiatna asulang zingzing hi. Jesu'n migentheite, damloute leh lungngai mangbangte nna atohsah in a gualzawl hi chih mun tamtah ah imuthei hi. Hun khat lai in Jesun a nungjuite kawmah, nang uh ka hung lungsiat bangin, nang uh zong khat leh khat kilungsiat tuah un achi hi. (John 15:12). Hujiahin Jesu'n lungsiat na in khovel ana zou hi.

Ahiehleh hi, LUNGSIATNA chu bangzahta a poimoh itadiai. Nah poimoh hina

e maw... adiahkholin ei ministry a umte adiing bang in. Lungsiatna taahsap jiahin bang zatvei kouhtuamte toh kaal ah, seppihte toh kaal ah leh mihinpihte toh kaal ah hahsatna leh buaina ituah kha ei chih ei mah chiat kidong lei ichi hi. Ajiahchu lungsiatna tellou in, mi izou sih diinga, khoi mun ah zong muninei sih diing hi. 1 Korinth13:1 in hichiin asoi hi. "Mihing hamte leh angel hamte in thusoi mah leng, lungsiatna ka neih louhin chu, sum-eng tunging aha ahilouhleh daah khut beh ging aha bang ka hi giap" achi hi. Atawp na diingin lungsiatna in mite hinkhua a zohdan taangthu tahtah khat igen diing hi.

World War II laiin America te sepaih Desmond Doss kichi khat a um hi. Aman gaalvan bang mah tawilou in gaal ana dou a, hijongleh America adia paahtawina sang penpen, medal of honor ana sang hi. Desmond Doss hih khristian insung hoihtah apan hung khanglian ahi. Aneu laiin anaupa toh akimawlina vah anau pa lu asuliam kha a sisan tampi zong apawt hi. A nu leh pate in zong amohsah mahmah uhi. Desmond Doss

in, a inn sung vah anun Bible chang thu sawmpiah akipan atate, tual na that diing ahi sih chih thute asoi khaah apan koima toh kihaulou diing, koima sisan suahlou diingin alungsim asukip hi.

Japan sepaih ten pearl harbor attack ahung bawlva kipan pasal chin agam adia sepaih a kuan di thu ahung um hi. Huchiin Desmondte unau zong ahung kisa uhi. Apan aphil sih mahmah a Desmond in apa kawmah pa kei gaaldou diingin ka pang sih diinga, gaal a liam leh baite keem di, medic combat a pangdi ka hi, achi hi.

Training na munah Desmond in gaalvan lam himhim training abawl ut louh jiah in a captain pa uleh alawiten chiamnuhna leh engbawlina anei in a simmoh mahmah uhi. Ni khat Bible sima a umlai tahin a lawite khat hung in a Bible ahung laah sah hi. Ka Bible hung pia in chia a nget leh, koimah toh kihaulou diing na chih hilou mo chiin a dawnga, huphetin Desmond in a mai khat vei asuh sah hi. Desmond in nang leh nang na ki lungsiat bangin na veng na paamte lungsiat in chihte a paipih hi.

Khatvei Japan te toh kidouna nasatah ahung um a, America lamten a lel mahmah uhi. Desmond akim apaam a adaah leh a liam abai tampi ahung mupan hi. Aman a liam abaite ahung kem pan hi. Kikaap tuahna abei nung in zong zaankhovaah in amah chu khol tuan louin alang alang ah aliam abai te hawl in adiang lehleh hi. Aman aliamte aliang apua in mun bit na mun ah a vakoih jel in amah chu a loite hawl in apawt khe jel hi. A captain pa un zingkaal in a liam tampi a camp gei va lum phengphung ahung muh chiang in limdang asa mahmah

a, bangchi dan ataile chia a dot leh Desmond in ahung hutkhiah ahi achi sauhsauh uhi. Huni apan a captain pa un Desmond a ngaisang mahmah a, gaalvan bangmah tawilou a galphual a apanlaah dan chu aheet in a ngaisang mahmah ta hi. Desmond in hi kidouna ah mi 75 te sihna apan ahundoh a, huchiin agam uh diinga paahtawina sang penpen medal of honor khuhsah in a um hi. Desmond Doss chu 2016 kum in kum 87 aphaah laitah in ateenna khua ah ana sita hi.

Lalpa'n simtute tengteng hung malsawm ta hen.



HAGAU KHAWLDAMNA NA NEI TAI ?

~ By Rev. S. D. Simte, Pastor NTBC, Tuibuang

Khrist a unau simtu deihtah, i Hundampa Jesu min in CHIBAI ka hung buuh hi.

Tanchinhoih Matthai 11:28-30 sung pansan in a tunga Thupi kipia tungtawnin saulou kikum khawm lehang uuthuai kasa hi.

Tulai i hun tuaah uh leh i dinmunte uh ka ngaihtuah chiangin tawluhai leh lungjiin huai kasa mahmah hi. Zaleenna, Nopsahna leh thovenna himhim umlou in puaahgih liantah in hung netkhum hileh kilawm bangin i um uhi. Koipouh a jawng-ahau, apil-amawl hindan kibang taanggual in i um khiukheu va, lehlam khatah hoih vanglah bang abat nachiang aum hi. A hi in i hung geelsau deuh leh beidot huaitah chu ana hizaw hi. Mailam hun diing sautah suangtuh leh geelngam zong ahita sih hi. Hichibang dinmuna um i hihtaah jiahun tu huna michinin i poimoh peenva ka heet chu Hagau khawldamna ahi.

HAGAU KHAWLDAMLOU

Mihingte Pathianin amah batpih leh hinna ahung

piaah (huhaihkhum)a siam, hoih bukim ahungsah mahmah himahzonglei, A thumanlouhna leh bohsiatna jiahin a loupina chingzouta louin haamsethuaahin i hung umta va, sihna leh gentheihna chu i tanuh ahung hita hi, huchu Hagau sihna leh tahsa sihna ahi (Gen.2:17).Pathian ngaihin mihingte chu a si i hung hita va.Pathian toh i kiguizopna/chimatna uh chu bohsiatna leh thumanlouhna jalin atanta a, Amah toh khen in i umta uhi (Gen.3:23,24). Hujiahin i hagau in khawldamna amuta siha, A thu i man meelmapa Setan ta i hung suaahata va, huchi in hagau khawldamna himhim neilouin sualna leh giitlouhna chintengah puuiluutin i umva, Setan suaahngawngkol pua in tonggimin i um uhi. Hikhu he in Jesu'n "*Nanguh tonggim*

leh puaahgih pote zousiah ka kawmah hung pai un” ahung chi hi. Sual jiahin mihingte hagau chu apumpi in akiseta a, lungsim leh tahsa tanpha in hoihna (khawldamna) mawngmawng I neita sih uhi.

HAGAU KHAWLDAMNA

Hagau khawldamna i neih louh jiahun khawldamna diing hawlin i taiveel va, khovel thilte- sumlepai, sana-dangka, innlehlou, siamna-pilna, minthanna, zu leh khamtheihte leh tahsa nopsahnate ah lungkimna diing leh nopsahna i hawlva, hizongleh hute khatmah in zong kumtuang daih diing khawldamna ahung pe theisih hi. Jesu'n khawldamna dihtah amah kawm chauh a um ahieh dan he in *'ka kawmah hung pai un, keima'n khawldamna ka hung pe diing'* achi hi (Matt.11:28). Na hagau khawldamna diing Lalpa Jesu kawm chauh ah aum hi. Unau, Lalpa kawm na juan uut ei ? Lalpa a khawldamna chu tu damsunga diing chauh hilouin kumtuang tan daih diing ahingaal a!

HAGAU KHAWLDAMNA BANGCHI TAN DIING

Jesu'n *“Kei Lampi, thutah leh hinna chu ka hi, keimah*

a pailouin koimah Pa kawm atung sih diing” (Jhn.14:6) achi hi. Hujiyahin ka kawmah hungun chi in ahung kou hi. Sual thuphatawia, lungtang kisiih tuntun leh hagau hasia a, kisiih puma kingaingiamtaha Amah kawm i zot in chu a hung ngaidam diinga, i puaahgih zousiah hung laahmangсахin i hagau ahung damsah diing hi (Psalm 51:17). A hutdamna gintaat leh pomna chu Hagau damna ahi. Lalpa Jesu chu thildang zousiah saanga i lungsiat peena, i lungtang zousiah, haatna zousiah, hinna zousiah leh lungsim zousiaha i lungsiat tahchiangin hagau khawldamna i tang diing uhi (Lk.10:27, Dnpkt.6:5).

JESU NGAWNGKOL PUAH CHU HAGAU KHAWLDAMNA AHI.

Jesu i lal leh hundamtu a i hung kisaan tahchiangin i puaahgih - Setan ngawngkol, ahung suutkhiahsahta a, Amah ngawngkol i ngawngah ahung baatsaha, Setan suaah ngawngkol apat ahung zaleensahta hi (Gal.5:1). Setan ngawngkola taangten chu tawldamna mawngmawng a musih va, gim leh tawlin a um zing uhi. Himahleh Jesu ngawngkol puaah chu

kumtuang daih diing hagau a khawldamna ahi. Ajiahchu A ngawngkol anuama, a puaah zong a jaang hi (Matt.11:30) Hi umjia chu i lungkhamna, hahsatna leh gentheihna zousiah Lalpa ah i ngah hunchiangin Ama'n ahung hamuanin ahung dawnjaang diing hi. I hinkhua ah bangteng hung tung mahzongleh Lalpa tunga i ngah chiangin i tawl adam diing hi. Jesu ngawngkol puaah chu Amah thunuaia thilbangkima kituhluutna, eimah deihteelna tel loua Lalpa, '**na thuthu hi heh**' chih theihna chu ahi. Huchibang na chih theih hunhun chiangin na puaahgih zousiah ahung laahmangsah diing hi.

Hagau a khawldamna i tanchiangin lungsim leh tahsa khawldamna zong i mu ngeei diing uhi. Tuni huna mi tamtahte puaahgih chi tuamtuam toh hinkhua genthei leh chimoh beidong

taha i um zing uh bang jiah ata diai ? Jesu ngawngkol paw loua eimah haatna leh theihna suanga i puaah zing jiahuh hi diing in ka ngaihtuah hi. Jesu ngawngkol na puaah louh in chu bangchihmah in na puaahgih a jaang ngeisih diinga, na sihnung tanpha in hi puaahgih Setan ngawngkol in kumtuangin ahung net den diing hi. Khawldamna hawlin na bawl theih teng bawlin hawl mahzonglechin Jesu kawm na zot louhin chu na mu ngeingei sih diing hi. Hujiahin unau, tuni in bang puaahgih na nei ei ? Lalpa Jesu'n '**ka kawmah hung pai in keiman khawldamna ka hung pe diing**' achi hi. A kawm na juan diai ? Na puaahgih ahung dawnjaang nuam hi. Ahung kouhlai in ngaihsah louin um sinla juan kinmeengin a kikheelma in.

Lalpa'n simtu zousiah hung vangpiyah chiatta hen!



NGAIHDAM A UMTE KAMSUAH AH KHRIST LIANPEN

- L. Suanmung

“Samaria khua ah Philip a chiahsuh a akawm vah Khrist thu a soi hi,” Silbawlte 8:6.

Mihingte i kamsuah chu buaina leh hahsatna ahi veu hi. Himahleh hi hun a gingtute dinmun et in, amah uh buaina leh hahsatna sang in Khrist mah liansah in asoi thupi mahmah uhi. Hichibang mah in tulai hun a ei uh Khrist Gingta a amah nungjuitute adiingin chu i سوالنا jiahva kumtuang gawtmun a pai diing i hih lai va, kross a i sih luang va hung si a, سوال ngaihdamna hung bawlsah tu pa tanchin soi hi athupipen a i koih ngeingei diing uh ahi.

KHRIST A NGAIHDAMNA THU TAANGKOUPIH

Philip in Khrist vanga hahsatna athuaahnate gen diing neilou a hi diai chita lei, tam tah soi diing a nei mahmah diing hi. Amah chough lou jong hahsatna leh thuaahna thu soi diing Khrist nungzuite lah ah tamtah i um ngei diing uhi. Himahleh, ama'uh thuaahna sanga Khrist

thuaahna pen ngai thupi a, amah uh thuaahna soitham saloua Khrist in misualte a ngaihdamna thu mah thupi a sah taah luat ziahun, a kam va pat in Khrist thu mah a pawt tam peen ana hi zel jaw hi.

Hujiahin, Khrist ngaihdamna hechiangloute adiing in Khrist tanchin soi diing anei sih diing va, husang in amah uh buaina leh hahsatna a soi tam jaw diing uhi. Khrist lungsiat vang a angaihdamna tangte a diingin chu Philip bangin Khrist Tanchinpha i soi diing uhi.

KHRIST TANCHINPHA IN SIATNA A TUNGSAAH SIH HI

I soi utpen leh lunglutnate mah in i lungtang a luah banah, i kam ah hute mah apawt tam peen hi jel ahihjjah in, leitung sil ngaihtuah tam ten leitung silte mah soitam pen in nei va, Hagau lam sil ngaihtuah tam ten Hagaulam sil mah soitam

pen in anei uhi. Huchi ahihleh nang lungsim leh kam apat bang thu a pawt tam peen ei?

Khrist lungsiatna tanchinpha soi jingtu na hi ei..? Ahih louh leh hi khovel silte..!

Hujiahin, khovel hahsatna thu na soi tam zoh khop leh nang apat a agahsua diing chu muhdahna, lunggimna, khaatna, kiletsahna chihte ahi diing hi.

Himahleh, Khrist thu mah

gen ut peen leh ngaihtuah tam peen a na neih leh, hu in siatna sangin hoihna leh tahsa leh Hagau a damna ahungtun diing a, gah hoihtah na suang diinga, lungsiatna, kingaihngiamna, thunuaigolhna, hepihna nei in midangte muh a Khrist nungjuitu muan huai leh etton taah na hung hi diinga, mial laha Khrist meel vaah taang sahtu na hi diing hi.

Lalpa'n hung malsawm chiat ta hen.



THUNATONGTE KI- ETTHAHNA DIING

(Midangte diinga thu i soi zing laiin ei a Pathian na tongtute a diing)

By ~ Evangelist Lunminthang Simte

Text: 2 KORINTHTE 13:5 – 6

5. *Ginna ah na umna viai mah nanguh leh nanguh kienkhia unla, nanguh mimal kienchian un. Ahihlouhleh nanguh leh nang un Jesu Khrist nanguh ah a um chih kiheet lou na hi viaimah?— etkiahna a chingzoulou tahzet na hih louhngaal uh leh.*

6. *Hizongleh keiuh chu etkiahna a chinglou ka hi sih uh chih na he diing uh chih ka kineem hi.*

A masa in hunhoih, hunpha hung pia Lalpa min in simtute chibai! Hi lehkhagelch chu thunatongtute a diing chih minvuah himahleh, Khristian zousiah ki-etthahna huamtel a gelh ahi. Awle, unau, kei a gialtu/gentu ngeei zong a chingpen, soiseel na diing umlou a Pathian natong, midangte sang in ken ka sem

hoihzaw hi chihna hilou in, Pathian thunatongte fulltime a amah natong diing a kipekhethe ki-etthahna diing tamlou ka hung kum nuam hi. Hubanah ngetna ka bawlnuam khat ahihleh, hih ki-etthahna diingte tungtawn a Pathian houpihna i tang theihna diing un ahi.

I. PATHIAN HAMUANNA EI AH AUM NA EI?

- 1) Pathian natongtute i inn ah mi ahung kholai vaah chiang un Peace or Nuam asa viai? ahihloughleh i innsung ah Jesu um ahi chiin a hethei viai?
- 2) Midangte'n i kawma um nuam a sa viai? ahihloughleh lakhai leh thahpi sukha bang a kisa viai?
- 3) Hua Pastorpa ei Kouhtuama hung pang diing ahi a, nuam ven, kithalawp huai na ei? a belamte a enkol hoih a, achi viai?
- 4) Hua mission workerpa toh i kithuahleh koipouh in nuam kisa achi viai?
- 5) Khopi leh singtaang lama umte in, lamkaipu hungzin di zong, kisahkhoh ngai, neeh bawllouh theihlough ningkitel huai ana chiviai?
- 6) Hi workerpa hung zinchiang in Pathian Thu tengkhat tengnih phattuampih ing, mite'n achi viai?
- 7) Jesu bang in mikhual zindotkha ah manpha in nuamsa ahung china viai?
- 8) A Pathian thugen hinglou nuamlou lah kikhoppih ngai ahung chi viai?
- 9) Hi workerpa hung zin a kikhop teitei di hi, a Thusoi nuamsa ing achi viai?
- 10) Local Kouhtuamte'n ka Thusoipa or Evangelistpa uh umsawtta ahung chi viai?
- 11) A Thusoi sawtlezong nuam in hamuan huai achi viai?
- 12) Heutupa office ahung kailoughleh Missed huai talua achi viai?

- 13) Tuni chuh heutuliante office hung kailou un NUAM JEEL eh achi viai?
- 14) I Teacherpa uh teaching nuam in class la uuthuaita achi viai?
- 15) Hi subject teacherpa a kithalawp vaingin a class boring talua achi viai?
- 16) Pastorpa innveh thase mawngmawng ahi ahung chi viai? Pastor neilou kibang a chi viai?
- 17) Pastorpa innveh a ahung lezong kikuppih man hilou ahung chi viai?
- 18) Ka Home Father pa uh hung bawldan nuamlou in home a pat suahtaat nadia daan ka bohsiat ahi, umpeih nawnlou inga achi viai?
- 19) Hi Home Fatherpa chu apanlai in ka nu, ka ni, ka pa, ka pu, ka pi, ka gang, . . . etc kawma umsaang in ka Hamuang in Nuam kasa hi achi viai?
- 20) Local kouhtuam a i memberte leh i mikolte'n Pawlpi ka taihsan uutlounhna chu pastorpa, workerpa tungtawn a HUTDAMNA leh BAPTISMA tang ka hi achi viai?

“...O Jesu NANG NA UMNA NUAM...”. chih bang in, O Thunatongtu nang na umleh nuam kisa mite chihtheih d in Hagau umpihna itungvah umchiatta hen....

II. PATHIAN AH HAGAULAM ANN MI'N EI AH AMU NA VIAI..?

- 1) Covid +ve apung bang in Pastorte i memberte PIANGTHAH a pung in a kibehlap jeel ei?
- 2) Kouhtuam pichingsa a Pastor na hihleh a Piangthah nailou naupangte leh pichingsate COUNSELING na bawl ngei ei?
- 3) Kouhtuam pichingsa a government headmaster te banga duty na hi siha, Hagau mangthang man diinga seem na hihlam nakihe jing ei?
- 4) Kouhtuam tahsa muhtheihlam chouha khangliana i memberte hagau a zawngkhal a liam mahmah jong hithei ahi.

- 5) Kouhtuam memberte tahsa tanchouha heet a huntawh siha, a Insung hahsatna uh SHARE THEIHNA na hijing na ei?
- 6) Home Father or hostel warden na hihna ah naupangte hagau in hinkhiat na nei ei?
- 7) Mission School teachers na hihleh hagaulama (muam leh teep) hinkho siangthou na studentte in zildoh anei viai?
- 8) Administrator NA HIHLEH na staffte ah hagaulam impact (lohsawn) nanei ei?
- 9) Evangelists hagaulam Burden neiloua Bialfang meimei na hiai?
- 10) Bible College lecturer hingaala JESU HIHNA mite zilsahloua Jesu tanchin Ngambawm taangthu heetna tan chauha zilsah na hiai?

Kouhtuam, Mission, Home, College, Office a um sa, a pichingsa mun a Duty Fulfill na-a na TERM SUNG tou meimei hiloua, hagau mangthai mandi leh hagau a pui piching diingin Lapa'n hung Suhaat chiatta hen.



GAH TAMPI SUANG

~ Rev. P. Khamthianmang

Chaang teel: Gah tampi suang unla, hung pung un (Siamchiilbu 1:18; 9:1)

Simtute i Lalpa uh Jesu Khrist min in chibai!

Pathian in amah limlemeel banga ana siam mihingte chu tampia gah suanga, punga leitung luah dim diing leh a silsiamte tunga thunei leh vaihawm diingin a vaangpiahi ahi chih i chaang tel tegel vapat achiang mahmah hi. Vaangpiaha aum bangva gah hung suangva, ahung pungva Amah aioha silsiamte tunga vai ahung hawm diing u'chu Pathian deihdan leh A loupina suhlatna diing ana ahi hi. Himahleh puuhna jiahin sil chu ngeina ahung nawtta sih hi. Puuhna jiahin nichinin hatsatna, natlesat huleh sihleman chu mihingte tungah khat baanah khat tungah ahung tung zing tamei hi. Hi haamsiatna chu mihingte tunga tung diinga Pathian siltup ahikha keei sih a, mihingte deihteelna jiaha a hung umdoh ahi chih achiang

hi. Pathian douin tunitan mihingte um zing mahleh mihingte a diinga Siamtu Pathian siltup chu akihei limdang nai tuansih a, hi siltup taangtun na diing in Pathian in pan ala zing hi. Huchiin Lalpa Jesu'n tanchinhoih Johan 15:1-8 sungah mihing tampia gahsuah diing leh Amah tungtawn chauha mihingte gah suahtheih ahihdaan ana sulang hi. Pathian in mimal chin tampi a gahsuah diingin ahung deih hi.

Pathian in nang leh kei chu tahsa leh hagau a gah tampi suang diingin ahung deihsah mahmah ahi. Pathian lehkhathu pumpi chu mihingte tahsa leh hagau a gahsuah theihna diingva thuhilhna ahi chilei i chi khial sih diing uhi. Sual jiaha liamna i thuah nung un zong Pathian in ahung thahsiat mei sih a, A siltup chu

a suhpiching sawm teitei hi. Huchiin, Lalpa Jesu tawnlouin, Amah a um ngiitngeetna louin gahsuhna tahtah umlou ahi chih Bible hung thuhilhna ahi. Khovel mite mita gahsuh toh Bible in agen gahsuh khu kibanglou ahi. Khovel mite'n chu innbul, loubul, neihlelam hauh, thuneitah leh mizahtaat huaitah khat hih khu gahsuhna ahi chiin ageel uhi. Himahleh Bible in tahsa lama gahsuhna achihte chu talenau a punna, ganhon a punna huleh silsiamte tunga vaihawmtu a panna asoina ahijaw hi. Huleh hagau lamah hagau gah tampi neih chu hagau gahsuhna ahi. Nangma'n bangchi bang mite hagau gahsuh ahi na chi e?

Pathian in tahsa lam gahsuhna saangin hagau lam gahsuhna ageelkhawh zaw hi. Huchiin hagau gahsuhna tungtawna tahsa gahsuhna ahung um diing chu amah deihdaan ahi. Thuhun Thah ah, Lalpa Jesu leh apostlete'n tahsa lam sangin hagau lam gahsuhna angai poimohva a taangkoupih nasa zotham uhi. Lalpa Jesu'n gingtute chu i neehletaah, i silhleteen diinga lungkham lou diing leh hi silte saanga Pathian lalgam leh A dihtatna hawl masat zaw diing

ahihdaan ahung thuhilh hi (Mat.6:31-34). Pathian lalgam leh a dihtatna khu bang asoina ahiai? Hi umzia chu mihingte'n sildang teng sanga Pathian amasapeen a i koih diing chihna ahi. Pathian amasapeen a i koih theihna diingun khovel lalgam daan leh Pathian lalgam daan kinungngat ahi chih i heet uh apoimoh hi. Pathian lalgamah Paul in Galatiate kawma agelh hagau gah "lungsiatna, kipaahna, hamuanna, thuaahtheihna, jaineemna, hoihna, ginumna, thunuaigolhna leh kisuumtheihna" aumna gam ahi. Hichibangte kalhin daan aum sih hi, chiin Paul in agelh behlap nalai hi (Gal. 5:22-23). Hujiahin Pathian lalgam i luut theihna diingun hagau gah i neih uh akuul hi. Paul in Hagau gahte chilouin hagau gah achi bangjiah adiai? Heetsiam poimoh ahihna ah saulouin enkhawm ni. Tuipigaala um thusoitu khatin, "Tehkhinna in, hagau gah chu sehsum pum khat sunga dal (slice) bangzah ahakhat aum toh bang ahi," achi hi. Gen nalh ka sa a, chiang zong ka sa khop mei hi. A umzia chu hagau gah chu khat ahi a a sungah a dal - lungsiatna,

kipaahna ... kisuumtheihna - aum hi chihna ahi. A dal (slice) aneu leh alet thu hilouin sehhum sunga aum diing zah dal aum kim khu sil poimoh ahimhambangin Hagau gah ka nei hi kichi photmahte'n Hagau gah a dal aneih kim apoimoh hi. Khat neia khat neilou chih sil hitheilou, aneu alet thu hilouin aum diing teng aum kim ngeingei diing sil poimoh ahi. Hagau gah nei in na kihe nai le?

Hagau gah neiloute Pathian lalgam ah aluut mei sih diing uhi ajiahchu Pathian lalgam chu hagau gahsuhahna gam ahi ngal a. Hagau gah bangchiin i nei thei diviaia? Hagau gah chu hagau a dimna apat hung piangdoh ahi. Hagau gahsuhah i utleh hagau a i dim diing, huchu Hagau Siangthou thununna nuaia i um diing uh chihna ahi. Ahihlouhleh Hagau in i hinkhua ahung pui diinga Pathian kawma i hinna i piaahkhatna ahi chiin zong achihtheih boh hi. Hagau in Pathian lehkhathu kalhin koimah apui theisih hi. Hujiahin Pathian thu dungjuia i gamtat leh Hagau Siangthou thununna nuaia i kituluuta, ama'n ahung pui hi chihna ahi. Huchiin Amah puia um zing photmahin

hagau gah tampi ahung suang diing hi. Huleh hagau gah nei mi chu hung hagamui deuhdeuh diinga Pathian lalgam nopna chu hi leitungah a damsung ngei in achiam diing hi.

Pathian lalgam chu neeh leh dawn thu ahisih a hagau gam ahihna ah hagau mi, hagau gah neite'n azaal azou thei chauh diing hi. Ahihleh Hagau gah neite, hagamui i chihthe koite ahi diai le? Nang koite hagamui na chi ei? Biaahinn kai taimate, thohlawm leh sawm-a-khat pe regularte, a pe tamte, kouhtuam leh pawlpi vei nguut nguutte, thusoi siam, haamteina thusam siam, laphuah siam, lasah siam, ahihlouhleh hichi chi ni e, kouhtuamin a phattuam pih silbawltheihna tuambiih leh thuumdamtheihna neite khu hagamui na e i chithe diviaia? Ahihlouhleh a hagamuiit jiahva hichibang silbawltheihna a neih uh ahi i chithe mei diviaia? Teuhlou, Pathian in phal teuhlou ahi ajiahchu hite zousiah kouhtuam suhhatna diinga Hagau silpiaah ahi. Hagamuiitna tehna vanzat diinga zat theih ahi laizang sih hi. Mathai 7:20 ah Lalpa Jesu'n, "Singkung hoih leh hoihlou chu agahin na he diing uh

achih mahbangin hagaumi leh milou chu a gah, Hagau gah aneih leh neihlough ah a heet theih mei hi. Hagaumi i kisah jiah hilou, mi'n ahung sah jiah zong hilou, i Hagau gah neih

leh neihlough apat hagaumi i hih leh hihlough mahni chiat i kienchian thei uhi.

Lalpa'n tampi a Hagau gah suang diingin hung gualjawl chiat hen. Amen.



TANCHINPHA VAANGA KIGAWM SANGGAM LAIZOM DOUGAAL MEELMA BANG SUAHH

Pastor. S. Khupchinhou, NTBC, Suangpeeh

February 16, 2020 Pathianni suun khawl lai lunggeel saulou toh thubul patna nei masa ni.

Kaihlet laa phuahtu khatin hichi'n ana geen a, "Zaanmang diinga zong kana deihlough khen diing simthu ngaihin leel e" ana chih chu lungsim mit ha ah ahung kilang hi. Saapkangete guntuhna leh hung awlmohna jalin igammial Tanchinpha vaah in hung taanvaah in, hi Tanchinpha vaangin singtang pamawl numawl te ihih zinglaiin zong saapkangete toh kichimat in ina umthei uh ahi. Amaute chouh toh zong hilouin khat leh khat te ikitanauna lianseema hung kaankhawmtu chu Tanchinpha mah hi in kathei hi. Tanchinpha mah hilou

maw ahung kaankhawmtu chi a ka kidot chiangin adawna chu baihlam tahin "Hi" mah ahizel hi. Manipur gam ningkawi a teeng haam leh pau kibangloute ihiva, himahleh ahung kaankhawm thei umsun chu Tanchinpha mah ahi peen in kathei hi.

Dotna dawng jiang diing hileh kilawm lah dawng hahsa ka sah aum hi. Huchu "Hichibang a hung na gawmkhawm tu Tanchinpha ahihleh huchibang hunlai a ineih uh Tanchinpha peen tulai a ineih Tachinpha toh kibanglough ahiai? Adawna pe diing chu pawlnih

in ka khen nuam hi, Dawnna masa diingin, “Tanchinpha chu akibang jing hi” akibang jing hi chi ihihleh bang diinga tuhun a kigawm lou a kikhen jing ihita diai?

Dawnna nihna diingin, “akibang nonsih chi hitalei” Tanchinpha chu akiheng limdang sih a, apai ngeiin apai zeel hi chih ahung umkit diing hi. Himahleh ngaihtuahna bukimlou toh ka ngaihtuah jiah zong ahi ngei diingin ka gingta, nidanglai a Tanchinpha ina neih uchu tuhun a ineih Tanchinpha toh kilimdangna um hita leh kilawm kasa hi. Dr. Dongthawng lehkhagelh ka simkhaah dih kasah mahmah chu “Zomite Pathian, Kukite Pathian ichituam uh, Zomite Pathian toh Kukite Pathian akibanglou ahikhkaah leh poi mahmah diing, huchouh hilou Zomite/Kukite Pathian ichih peen KUMTUANG PATHIAN ahi nai? Vaan leh lei siamtu Pathian ahi nai” ana chih chu kidot tham mahmah hi in kathei hi. Hujiahin ei Simte tate’n zong khatveinung et kiitlei ichinuam ahi, tu a ineih Tanchinpha peenin hung khenjaah in pawltuam paituam hung bawlkhia in khangthah ki-iit kingaina

semkhawm, nekshawm, nuikhawmte tu in dougaal meelma banga ki um hita meilou ahiai mah?. Kouhtuam chin phial ah ikiphuhkhiat na kum 25/50/60 mualsuang lian tahtah leh kilawm tahtah ibawl va, hitobang Jubilee daah isaat a zong ngaihdamna umtheiloute, Jubilee kum bangzat lawm lei zong ki ngaidam theilou ihihleh I Pathian thu awi peen inunget thah uh poimoh diing hileh kilawm hi. Simte tate tuhun a hung gawmkhawm chu Jubilee daah hi nonlou in si daah te bang ahung hita daih mei a, dahhuai isa ahi. Ka pa Khup S. Langchinkhup thugelh na apat athuteng ana zat hung kheel leng, “Kumhei natna” hi kumhei natna peen bangchileh damthei diing? Adam theilou natna ahisih chih chiang kasa ahi. Hunteng a natna akichi sih a, kumhei achih inchu kum bangzat ahiai zohchianga natna tung ahi. Hujiahin tahsa natna thupitah tah te zong damthei ahihleh hitobang kum 10/20 hal a umkha natna chu a damtheih lamethuai hilou maw...?

Taangthu simtam ka hisih a, himahleh ipawlpisunga kum bangzat ahiai dan a siltung

hitobang kikhenna kumhei natna deihhuai loutah chu ilahvah aum zing ahi chih mitin zong imu a aneupen apat aliantan in zong ithei uh ahi. Tanchinpha vanga ki-iit kingai sanggam laizom zatamte meelmapa setan jalin tuin dougaal meelma bangta chileng kachi khiallou diingin kathei hi. Simte tate ikikhen uh ichih chiangin akhenin NTBCA a um diing chi bangin ina lunggeel uh ka gingta ahi, himahleh ka hung geennuam peen chu NTBCA a um sese hilouin lungkituah in iumthei sih uh chinuam ka hi zaw hi. Pathian natong te nangawn zong ki-mitsiip tuah, khat leh khat kikumkhawm dialdial loua ki-thangsiat tuahna in ilungsim vah mun aluah jouzaw tamai hi. Apoi hi chihkheel behlap touh diing chu avaang mahmah hi.

Tanchinpha jaal a kiloiikhawmte tu in Tanchinpha minsia posah a kikhen thaangin ium zouta va apoi peetmah hi. Tanchinpha mah hilou maw hichiang itun na uh? Tanchinpha mah hilou maw mite lah a simtel theih a hung umsahthu? Tanchinpha mah hilou maw ahung

kaankhawmtu? Niih leh puan silhdan theilou a singtaang a sumtawng bete ihih lai a tu a niih leh puan hung silhsah a, milian milal te bang a hinkhua hung jangsahthu Tanchinpha mah hilou maw unau? Bangkim a ibangkim ikipatna bangkim zaw Tanchinpha mah hive aw maw? Ahihleh hite tengteng kiheetmohbawl a Tanchinpha minsia posah a pawltuam paaituam a kikhen tou jing diing I diai? Khang hung umtou diingte'n ikhang a siltung ahung simva ahung theih chiangun bang lungsim ageel tamai diu viai?

Laphuahtu khatin “Nang bei a kei hitheilou, kei bei a nang zong hitheilou, kikhen thei ihisih” ana chih chu lungsim ah ngaihtuah dohthah in tangtawn daih diing Sianmang simthu paitem bang kuahin mapang khawmin nichinin sualgaal doukhawm diingin khangthah te'n haanlung chiamni.

Soikhelh leh vaal aum leh Ngaihdam.



KINGAINGIAM CHAPOU

– Lian Hangluah

‘Kingaingiam chapou’ chih thumal gomkhawm i jakha ngei khol sih diing uhi. A tamzawte’n i jah patna uh jong ahi maithei . ‘Kingaingiam’ thumal khatna chu minuai a kituluut, mite amah sanga lianzaw a koih hubaan ah jahtaat nalai hi; polam a mite’n a muhdaan a jong a mit sang hahlou, aw khauh a haam loute ahi. A baan ah ‘chapou’ thumal khatna chu midangte bangmah a simlou, mahni thu chauh deih, midangte’n kei bang chiin ang mu viai chih gellou a mahni kikoihsang, polam ah mite muh a kilanga mitsang hah, aw puaah, haam kamsuah kisumtheiloute ahi uhi. Hi thuteng nih tegeel a khatna jong tuam tuah, ki kelki mahmah ahihvangin ka hung koihkhawm hi. Hichibang thumal kikalh nih munkhat a koihkhawm a hithei diing a maw ? Dihlou deuh hilou maw?

Hithei tham e. Dihlouna umlou ahi. Eisanga haam piching jaw leh changkang jaw English haam in jong atunga tobang thuteng a nei hi. William Shakespeare in jong “*Romeo and Juliet*” novel ah thumal nih thil khat uang genna diing in ahung nei hi. Hu thuteng nih ahihleh ‘-O loving hate!’ ahi. English haam ah hitobanga thumal nih kikelki kigawm tapi a um hi. Etsahna khat en nalai le-‘bittersweet’ bang ei haam in letlei ‘kha-hum’ chih ngai diing dan ahi. Ahihleh hitobang thuteng nih kigawma khatna (meaning) neite bang a kichi eile? English haam ah ‘oxymoron’ akichi


hi. Hi thuteng hi kum 1657 in ana kizang pan hi. *Merriam Webster* dictionary in a gendan in ‘oxymoron’ hi ‘moron’ toh a thutuun kibang ahi a, Greek haam apat hung kilakhia ahi. A khatna chu ‘mingol’ chihna ahi. A khatna (meaning) za zaw (broad) deuh a en lei, ‘oxymoron’ chu thuteng kikalh nih gomkhawm ahihlounleh koihkhawm ahi. A khatna chu a context dungjui a letkhat theih ahi. Ahi’n hi thumal kigomkhawm tegel peen a thu khatna khat chauh a pailou in a nih a pai khawm veve ahi. A nuaia etsahna ensuh lei i Chiang zawsem diing hi.

Pathian thugen khat in a thugen ma in thugen siam sih jong leng hung gen himhim ning chi'n pulpit tungah a hung ding hi. Thugen siamlou tahtah hileh kisuanglah tahin a theih khamkham hung gen diing ahi. Thugen siamlou ahihdan mimai a pulaah jenjen lou diing ahi. Alangkhat lamah hipa peen thugen siam kisa huntawh thou (kideihkhop sim) ahivanga mite maia kingaingingiam taha haam ana hizaw daih hi. Lungsim tawnglam ah kiletsahna, kideihkhopna um in, polam ah mite muh a kingaingingiam deuh a haam ahi. Hipeen 'kingaingingiam chapou' etsahna hoihtah ahi.

Pilna-siamna, midang bawltheihlough Pathian in talent ahihloughleh gift a hung piah mihing in kinei chiat ahi. Hi talent ahihloughleh gift semsua diing a lamkai khat in mohpuahna ahung piah leh 'kei hitobang bawltheilou hiveng aw' chia lungsiang taha gen hileh kilawm khop a nual in kingaingingiam na aw sua. Ahi'n hi nang na pantheihna, ahihloughleh nang na siam khat peen midang a siamkhollou

khat in na dinmun aluah leh singpi hotel vel, khanglai kimuhkhawmna vel, lusuunna mun, moulopna mun vela nang luanga pang (sem) mipa khu na lungsim a na mohsah in na dem hi. Hichia miteng kawma na gen in kichapouhsahna tawpkhawh nei nahih daan kilang hi. Bawltheilou i chihleh bawltheiloute umdan a um mai diing, midang va dem se louh diing. I nam sunga hitobang mi tampi in i neih jiahva ki khangtheilou ahi. Hi 'Kingaingingiam chapou' lungput i neih uh khu i nam khanmohbawh lianpen ahi.

Khatvei ka lawipa'n tuivai lama nga 3kg lam hung man in, inn lohchingtah in ahung tung hi. "Ngamat siamlouh toh nga hichi jah chauh kiman avele" ahung chi a, ken amah kawma, "mi muh a, na kam chauh a kingaingingiam na hi a, na lungsim chu kichapousah ahi" ka chi hi. Hikhu jong kei ngaihdan in kingaingingiam chapou kachihte laha khat ahi. Pathian in michapoute a doua, lungtang kingaingingiamte hehpihna a pia hi chih mangngilh dah ni uh maw ... (Jakob 4:6).



MISSIONARY TANCHIN

John Dreisbach

Pian kum : 1921
Sih kum : 2009
Pianna gam : Ohio, USA
Kouhna tangna: Nigeria.

John Dreisbach chu unau thum lah a aneupen ahi a, Pathian laumi innsung apat hung khanglian ahi. A pa chu Sunday School a Superintendent ahi a, anu jong Sunday School teacher leh Women's Missionary Society a member khat ahi. John chu gamdang ah Missionary diing in a lungluut mahmah hi. Anu leh pa ngei in jong atate chu apianma un Pathian natong diing in ana laankhia uhi. Kum 12 aphaah lai in, Biahinn a Revival Crusade aum a, John in a sualnate kisihi in Lalpa Jesu a Lal leh Hundampa diingin a na pomta hi. Anu in John chu Missionary taangthute atam theilam sim diing in hasot jel a, huchiin a tawplam ah ataangthusimte tungtawn in Pathian in Africa gam ah Tanchinpha soi diinga akouhdaan a hechiansah seem hi.

Medical School apat a graduate joh in, Azi Bettie toh Nigeria, West Africa ah Missionary diing in kum 1948 in akuandohta uhi. Huchiin Nigeria ah mi phaahte etkolna Hospital lian-tahtah mun thum ah Superintendent in aseem hi. Huleh agam mite chu Muslim sahkho jui ahijjah un, Pathian thu soi jaah diing chu a tuppipen a hijing hi. Huchiin Pathian thu a mite hilhtheihna diing in Bible School te bang bawl in, khenkhat te bang Pastor hihna tuthei diing in zilsahna pia uhi.

South Carolina ah Bob Jones University in John chu inn lam a sutu a um sung in Medical Missions a kizilsahte Jilmun bawl diing in ana guat uhi. Aman chu mission field mun mahmah a experience neih chu sil poimoh mahmah khat a ageelte ahi. Huchiin aman jong 'Lungsiatna Siltup' kichi khat natoh hung pandoh in student tamtah kawm ah training pia in aum hi. John chu a Univeristy te'n seemtu khat bang in koih mah leh uh, amah

leh aji chu Medical Missions ah Lalpa adiing a mimaltah a naa seemdan in akigeel uhi.

John in chu a hinkhua sautah chu college student-te kawm ah thuhilhna leh Foreign Mission akuan diing in hasotna a nei jeel hi. Aman ana bawl jeel sil khat chu khangdawngte khovel ah Pathian thu theh jaah diing in achou jeel a, tuhun in hi khangdongte chu mun tuamtuum ah Missionary natong in aum uhi.



SADHU SUNDAR SINGH TANCHIN

India gam a Khristian gingtu tanchin ki gen tenga a tanchin genkhah a ana um veu leh Khrist pasal hangsan, Sadhu Sundar Singh hi 1889 September ha in India gam Rampur khua, Patiala ah piang hi. Amah ahihleh innsung hausatah leh Sikh sahkhuumi mahmah innsung a piang ahihziah in, a neu apat in a nu leh pa in Sikh Temple ah pui zel in, Sikism ana zilsah zel uhi. Huchiin kum 7 ahih in Hindu sahkhua biahna laa kulmuut mahmah Bhagavad Gita achih uh a thei bei hial hi. Huleh Sundar kum 16 ahihin Hindu lehkhabu poimoh tah Veda chu hoihtah in athei

ta hi. Huin Sunder in Sadhu kichite khat kithuahpih zel in huchiin amah zong Sadhu te bang a kikoih siangthou diing in ahung utta hi. Sundar chu Sadhu a pang in huchiin zieleh ta nei lou in India gamsung mun tuamtuum a hung fangkual ta hi. Tahsa siangthouna aneih vaang in sum leh pai ah miten neucha cha panpihna apiah te uh chihlough bangma dang a neisih hi. Sundar in hicha sahkhua a diing a kipumpiah a a um zing lai in, a lungtang ah thomhauna, lungmuangna leh tawldamna in a dim zing ta ahi.

Sundar hibang a Sadhu hinkhua zang diing a ana

thuhilhtu ahihleh koi dang hilou in anu ahi hi. Huchiin Sundar chu Raipur a British Mission School ah akaita hi. Hi school a kai apat in Khristian te Bible ahung theipan ta hi. Ahiin Bible ah amah a lungluut sih a, hu sang in Hindu sahkua a dawi leh kau biahna lampang a lungluut zaw hi. Huchiin kum 14 ahihin Sundar chu anu in a beisan ta a, hihun apat in a hinkhua nasatah in hung kiheng limdang pan hi. Hulaiin Sundar in Bible hileh Pathian thugen missionary haw zong nasatah in ahua hi. Bible amuhte bang haal in huleh Pathian thugen te bang suang in sep zel hi. Hibang teng a bawl vaang in zong a sahkua zuih ah lungmuanna himhim a nei thei tuan sih hi. Huchiin Bible a haal zoh nithum ni in beidong talua kisa in zingkaal matah in Pathian kawm ah a haamteita hi. Amah chu hichiin a haamtei hi, "Pathian um tahtah na hihleh lampi dih chu hung kawh muh in, ahihloughleh ka umna nungram a rail zingkaal daah 5 a hung tai zel peen kiphulum sah diing ka hi," chiiin a haamtei ta hi. Huchiin khatvei a haamtei kiit a, limdangtah in a room

sung chu vaah in a hung khohta hi. Amah ngaihtuahna ah kuangbei diing ka de aw chia a kigeel laiin huchi diing bangma a um sih hi. Huchiin awl in a haamteina Pathian in hung dawng hi diing chiin a hung theidohta a, Jesu meel tobang ahung muta hi. Huchiin Jesu'n a kawm ah, bangtan hung hawl diing na hiai? nangmah hundoh diing in ka hung a, bang diing a lampi dih chu zui meilou na hiai? ahung chita mai hi. Huchiin Sundar in Jesu Khrist sihna leh Thohkiitna a hung theichian panta hi. Huhun apat in Sundar ah lungbuaina, thawmhauna leh lunggimna zousiah ahung thengta hi. Khrist ah siamthah ahihtaah ziahin Baptisma tang diing a uut a, himahleh a innsung miten a phalsih uhi. Hchiin kum 1905 a piangni in Shimla a English biahinn ah baptisma a innsung mite phallouh sa sa in ahung tangta hi. Khristian ahih apat in a innsung mite, a iit leh ngaihte in a hung khenta uhi. Baptisma ahung tangzoh a pat in Sundar zong Tanchinpha taangkoupah a vaahleh diing a hung tumta hi. Huchiin Hindute laha tanchinpha

phuangzaah diing in Sadhu bang in ahung umta hi.

Huchiin, October 16-1905 in bangma neilou in a Sadhu puan chouh nei in tanchinpha taangkoupih diing in ahung vaahleh ta hi. Kum 1906 in a masapen diing in Tibet gamah tanchinpha taangkoupih diing in a kuandoh hi. Tulai missionary te bang a panpihtu diing bangma nei sih mahleh, Tibet gam vuuh gamah tanchinpha taangkoupih diing in a kuandoh hi. Huchiin Tibet gam a zotlaiin lampi ah American Missionary pasal khat a min Stoker toh ahung kituahkha uhi. Anih un sum le pai neeh diing bangma neilou in a paikhawm va, a chang chiang in kawlhawm bang ah giaah in tanchinpha a taangkoupih zel uhi. Huchiin Sundar khatvei chuh damlou in ahung umta a, huin a lawm Stoker in a lawite khat Europe mi khat inn ah a enkol hi. Hu inn neipa in Sundar kipiahzohna amuh in thupi asa mahmah a, huchiin amah zong ahung piangthah lohhal hi. Huchiin Sundar ahung damdoh phet in St. John School of Theology, Lahore ah kum

nih Pathian thu ahung zilta hi. Huchiin a pawtna mun mun a Tanchinpha a taangkoupih zel a, munkhat ah singdawn a Pathian laa a sah chu mipiten za nuamlou in, kaikhia in a sawisa uhi. Amah chu min sawisa zong a deu tuan sih hi. Tanchinpha ziah a aluhluulna in a sawisa tute ngeeiin zong leh hundamna ahung neita uhi. Khatvei bang Nepal gam a achiah laiin suammang miten amah ana taangta uhi, ama'n zong a si diing hita ing chiin a kikoih hialta hi. Huchiin thahsawm in aumva aman zong haamtam louin a ngawng a dohta hi. Huchiin suammang miten zong limdang sa in a puansilh laahsah in a nuse mei uhi. Huchiin misuamte Sundar puansilh lasah pa chu lungsim nuam theilou in Sundar puansilh chu ahung pekiitta a, huchiin Sundar in Pathian thu mi hausapa leh lazar tanchin ana simkhum leh humipa chu kisiih in ahung piangthah ta hi. Huin aman Sundar a inn ah a umpih ta hi.

Huchiin Sundar in nidang a Khristian tanchinpha taangkoupithe ana soisah mahbang in ama'n zong tuin

soisahna tamtah ahung tuah zing ta hi. Huchiin 1914 in Nepal gam a Buddhist houtute in amah chu thah diing in thutanna a neihkhum ta uhi. Huchiin beel lian mahmah khat tuisuang sou bulhbulh in Sundar chu huah khum in chabi a kalhkhum va, ni nihzoh in aladoh uhi. Huin Sundar chu limdangtah in silou a um chu mah asa mahmah uhi. Ajiahchu Pathian apat panpihna neilou hileh Sundar a diing in suahtat daan aum sih hi.

Huchiin kum 1918 in Madras ah nna atong a, hutah ah mipi tamtah maiah thu agen a, mitampi in hutdamna atang ta uhi. Huleh India gam mun tuamtuam ah zong a vaahkual lehleh hi. Kum 1918-1919 kikaal in Malaysia, China leh Japan vel a tawnsuah hi. Hulou zong khovel gam tuamtuam ah zong Tanchinpha gen in a

vaahlehleh ta hi. Zin leh na ah thil limdangtah zong a tuah zel hi. Khatvei a zinkualna mun bazar ah tanchinpha a taangkoupah laiin miin suang in a sep uhi. Huchiin mikhat in a lu suang in a sepkha a, a sepkha pa lutang ana zaw hi. Sundar chu mi kingaingiam tah ahi a, huleh vaahlehna ah mi nasemte seppih in nasep kawm in tanchinpha ahilh zel hi.

Sundar chiingdan khat ahihleh kum teng in nipi nisat hun chiang in Tibet ava tuan zel hi. Ama'n Tibet gam aveina mahmah mei hi, a tawpna diing in 1929 in a vapha kiit a hunung in amah tanchin heetkhah in aum nawn sih hi. Khenkhat in vuuhlah a kia a si hi diing in a gingmoh uhi. Khenkhatte inla Thuhun Lui zawlnei Elijah bang in Pathian in a hing laah hi diing chih a gingmoh uhi. Ahiin a sihna theichiang koima a um sih hi.



I HINKHUAA SIL TUNGTE


~ S. Kamthansang

Khovelah bang diinga hung piangkha ka hiai? chia eile ei kidoh abaihsam khop mei..

Kipaahna leh nopna ten ahung tuam hun chiangin bang mah aki bawl sih hi. Ahiin hahsatna huihpiin ahung tuam hun leh I hinkhuua beidotna ahung tun chian mihing lungsim a buai ngaala. Ei lamah dotna atam nuam khop mei,Bible a I et leh JOB hinkhua a siltung imu a,a tunga sil tung teng teng a chiilin ahesiam pah ngal tuan sih hi,a hinkhua ah dotna tampi anei thou ahi.JOB 3:11(Suula pata bang diinga si lou ka hiai? huleh gil apata ka hung pawta bang diinga ka hagau hahlou ka hiai?Hi Bible chang leh a tunga sil tungte ahesiam pah siha,JOB ngeei jong abeidong ahi chih imu hi,..

Hauhsatna in ahung tuam hun chiangin heetsiam pahngal ahah veu ahi,,I heetsiam ngaal louh jiahin eimah ah kidotna neih tam dahni,,! I hinkhua a hahsatna tampi hung tungte hi mittui ke kawma I thua mualsuah joh nung chianga heetsiam theih silte ahijiahin,I tuaah lain dotna nei mei louin,hibang eia dotna ahung tam chiangin sil poimoh louah kibuai sau giap ahi.

I tunga siltung bangkim hi Pathian hung heetpih veh ahi a,,ahung puui sawm daan hoih taha ngaihtuahin I suut chian angaijo ahi....





BOOK POST

(PRINTED MATTER)

POSTAL REGD. NO. MNP-60

To.

.....
.....
.....
.....

PIN

<input type="text"/>	<input type="text"/>	<input type="text"/>	<input type="text"/>	<input type="text"/>	<input type="text"/>
----------------------	----------------------	----------------------	----------------------	----------------------	----------------------

If undelivered return to:

New Testament Baptist Churches Association

Regd no. 1192 Of 1973 Under Society Act XXI of 1860

Post Box - 45 Bible Hill, Rengkai

Churachandpur - 795128, Manipur, India.